

ԶՎԱՐԹՆՈ՞ՅՈՒ, ԹԵ՞ ՆՈՐԱԶԵՎ ՇԻՆՈՒԹՅՈՒՆ

Մարտի 31-ին հանդիսավոր պայմաններում, համապատասխան արձանագրությամբ քար կանգնեցվեց այն տեղում, որտեղ կառուցվելու է մայրաքաղաք Երևանի գլխավոր՝ Գրիգոր Լուսավորիչ եկեղեցին:

Դեռևս ճշտված չէ, թե ինչպիսին կլինի այն, ինչ նախագծով կկառուցվի: Անցյալ տարվա սկզբում Ամենայն հայոց կաթողիկոս Վազգեն Ա-ի կողմից որոշված էր նոր կառույցով կրկնել հայ ճարտարապետության չգերազանցված կոթողը՝ հռչակավոր Զվարթնոցը: Վեհափառի իսկ հանձնարարությամբ վերականգնման նախագիծը հոգևոր խորհրդի ճարտարապետական-շինարարական բաժնում արժանացավ հավանության: Հանձնարարված էր նաև նույն հորինվածքի սահմաններում հարմարություններ ստեղծել տաճարի սպասավորների համար, որը և արվեց: Այդ որոշումը, սակայն, չէր համապատասխանել որոշ պաշտոնյաների ըմբռումներին: Ինչու՞ կրկնել, երբ կարելի է նոր նախագիծ կազմել, որ լինի մոդեռն՝ որոշ չափով, հայկականի խառնուրդով: Մասնագետները այդպիսի «ոճն» անվանում են էկլեկտիկ: Հայ ճարտարապետությունն ունի իր հիանալի ավանդույթները, հարյուրամյակների ընթացքում մշակվել, բյուրեղացել է հայկական ոճը, դասականորեն պարզ ու անպաճույճ՝ կրելով լուսավոր բովանդակություն, վեհացնող հորինվածք, կառուցողական հմուտ վարպետություն: Հայկական հուշարձանները իրենց աստվածային բարեմասնություններով գրավել են նաև օտարին և որոշակի վերափոխություններով կրկնվել աշխարհի տարբեր կողմերում: Մենք կարող էինք դեռևս կես տարի առաջ կամ հենց հիմա Զվարթնոցի նախագծով անմիջապես սկսել շինարարությունը: Մինչդեռ այժմ ծրագիր է մշակվում նախագծման մրցույթ հայտարարել: Թե ինչ կշահենք դրանով, հայտնի չէ, սակայն պարզ է, որ կկորցնենք շատ բան և ամենակարևորը՝ ժամանակ:

Զվարթնոցը վերականգնելու, կրկնելու գաղափարը նոր չէ: Հայտնի պիտի լինի, որ դեռևս 1944 թ. Էջմիածնի կաթողիկոսական տեղապահ (հետագայում կաթողիկոս),

արժանահիշատակ Գևորգ Չորեքյանի ջանքերով միութենական կառավարության նախագահի ստորագրությամբ որոշում կայացվեց Ջվարթնոցի ամբողջական վերականգնման վերաբերյալ:

Ավելի ուշ եղել են այլ որոշումներ ևս: Ջվարթնոցի ավերակի հարևանությամբ այն որպես հուշարձան վերականգնելը մեր պայմաններում հնարավոր չէ. շտապ օգնության կարիք զգացող հազարավոր հուշարձաններ ունենք: Միակ իրական հնարավորությունը Ջվարթնոցը Երևանում կառուցելն է, որովհետև նրա ճարտարապետությունը չափանշային առումով նույնպես մայրաքաղաքային է: Մի ուրիշ տեղ կառուցելու սպասելիքները բացառվում են:

Երևանում կառուցելով Ջվարթնոցը, միանգամից երեք բան ենք շահում. նախ՝ վերականգնում ենք մեր ժողովրդի 7-րդ դարում իրականացված հանճարեղ ստեղծագործությունը: Ապա՝ օգտագործում ենք նրա կիրառական հնարավորությունը իր իսկական նշանակությամբ, որպես գործող եկեղեցի: Եվ երրորդ՝ մեր մայրաքաղաքը ձեռք է բերում քաղաքային տարածական հորինվածքի յուրօրինակ ուրվագիծ, որպիսին քիչ ունի այժմ:

Ձեռքից բաց թողնելով ներկա առիթը, մենք կորցնում ենք ժողովրդի հոգևոր գանձերից ամենաարժեքավորը կյանքի վերակոչելու բարեպատեհ առիթը:

Արդ, ի՞նչ է իրենից ներկայացնում Ջվարթնոցը, որի հոյակապ պատկերի հավերժացմանն ուղղված միջոցառումներ են ձեռնարկվել անցյալում, Բագրատունյաց թագավոր, իշխանաց իշխան Գագիկ Ա-ն մայրաքաղաք Անիում, 1001 թվականին, երբ լրանում էր քրիստոնեության ընդունման 700 տարին, կառուցեց Ջվարթնոցի կրկնօրինակ սուրբ Գրիգոր եկեղեցին: Նույնպիսի ձեռնարկման կարիք է զգացվում նաև այժմ: Չէ՛ որ 2001 թվականին լրանում է քրիստոնեության ընդունման 1700 տարին:

Ջվարթնոցի գովքն արել են ինչպես կառուցման ժամանակ, այնպես էլ հետագա դարերում շատ գործիչներ՝ Սեբեոս եպիսկոպոսը, կաթողիկոս Հովհաննես Դրասխանակերտցին, Ստեփանոս Տարոնացի Ասողիկը, Սամվել Անեցին, Կիրակոս Գանձակեցին, Մխիթար Այրիվանեցին, Վարդան Բարձրաբերդցին և ուրիշներ: Սովսես

Կադանկատվացին «գրագնապայծառ» անվանելով Ձվարթնոցը, նաև հաղորդում է, որ Հռոմոնց թագավորը «... յաւերժ հիացեալ ընդ շինուածն՝ ետ հրաման շինողացն գնալ զկնի իւր, զի գնոյնաձևն յարմարեսցե ի պալատանն»:

Ճարտարապետ-գիտնական Թորոս Թորամանյանը գրում է. «Բյուզանդիան ունի աշխարհահռչակ մի ս. Սոֆիա, իսկ Հայաստանը նորա դեմ կանգնել է մի Ձվարթնոց, որը բարձր գլուխ կպարծի իբրև ճարտարապետական գոհար բոլոր բյուզանդական շինությունների մեջ»:

Ա. Յակոբսոնը Ձվարթնոցի մասին գրում է, որ այն «հայ դասական ճարտարապետության զարգացման ապաթեոզն էր, նրա ճարտարապետության նոր փուլը, օրինաչափական զարգացման ընթացքի հուշարձանը»:

Կասկածի կամ վիճարկման ենթակա չէ, որ հայ ճարտարապետության զարգացման գլխավոր գիծը 7-րդ դարի կեսերին անցել է Ձվարթնոցով: Ձվարթնոցը հանդիսացել է իրեն նախորդած ողջ ժամանակաշրջանի ճարտարապետության տրամաբանական շարունակությունը, զարգացման թռիչքներից մեկը, նրա պսակը:

Նախքան Ձվարթնոցը, քառախորանի թեման, որ Ձվարթնոցի միջուկն է, շուրջ երկու հարյուր տարի մշակվում էր հայ ճարտարապետության շրջանակներում: Ծավալատարածական հորինվածքի առումով եռաստիճան հորինվածքը, որպիսին Ձվարթնոցն է, Հայաստանում առկա էր 7-րդ դարի սկզբներում, ի դեմս հանրահռչակ Բագարանի (624-631 թթ.): Նախքան Ձվարթնոցը դեռևս առաջին դարից հայտնի էր սյունաշարը Գառնիում:

Ինչպես տեսնում ենք, Ձվարթնոցում գործադրություն գտած ճարտարապետական բոլոր ձևերը կային մեզ մոտ: Հետևաբար երբեմն լավող որոշ նիհիլիստական արտահայտությունները պարզապես Ձվարթնոցը մասնագիտորեն չուսումնասիրած Կլեյնբաուերի անհիմն տեսակետների արձագանք են: Ձվարթնոցի կառուցման տեղը պատահաբար չի ընտրվել: Համաձայն ավանդության, այդտեղ են միմյանց հանդիպել Գրիգոր Լուսավորիչն ու թագավոր Տրդատը, որոնք էլ քրիստոնեություն հռչակել են Հայաստանի պետականորեն ճանաչված կրոն: Ձվարթնոցը Էջմիածնի հակակշիռը չի

եղել, կամ փորձ չի հանդիսացել նսեմացնելու Էջմիածնի համբավը: Զվարթնոցը կառուցվել է այն ժամանակ, երբ հայոց կաթողիկոսությունը գտնվում էր ոչ թե Էջմիածնում, այլ Դվինում: Եվ երբ մեծ երկրաշարժից կործանվում է Դվինի հոգևոր կենտրոնատեղին, կաթողիկոսությունը տեղափոխվում է լուսավորչական Չվարթնոց:

Զվարթնոցը քաղկեդոնական եկեղեցի չի եղել: Այն հանգամանքը, որ բյուզանդական կայսրը իր քսանհազարանոց զորքի ներկայությամբ 652 թ. եկեղեցու օժան ծեսին մասնակցեց, դեռ չի նշանակում, թե եկեղեցին քաղկեդոնական էր: Եվ վերջապես, այդ ժամանակների տեսական դոգմաները չէին վերաբերում եկեղեցու շինության տիպերին. նույն եկեղեցական շենքը տարբեր ժամանակներում սպասարկել է թե՛ լուսավորչական, թե՛ քաղկեդոնական համայնքներին: Այդպիսին է եղել, օրինակ, զվարթնոցատիպ Բանակ տաճարը:

Ինչպես հայտնի է, առաջիկայում նոր եկեղեցի է կառուցվելու Սպիտակում: Նման ցանկություն են հայտնել նաև այլ բնակավայրերի համայնքներ: Արդ, ի՞նչ պիտի նրանց առաջարկվի, նո՞ր նախագիծ, թե՞ հնուց ավանդված, սրբագործված լավագույն օրինակների վերարտադրություն: Մենք այժմ գտնվում ենք մի այնպիսի յուրօրինակ վիճակում, որ հնարավոր է կայացվի առաջին հայացքից ոչ տրամաբանական թվացող որոշում: Բանն այն է, որ հայ ճարտարապետության շատ արժեքավոր հուշարձաններ, որոնք իրենց տեսակի մեջ եզակի են, գտնվելով մեր պատմական հայրենիքի տարածքում, անխնամ մնալու հետևանքով մեծ արագությամբ խարխլվում և կործանվում են: Այժմ իրողություն է նրանց շատերի իսպառ անհետանալը երկրի երեսից: Շատերը կործանվել են միտումնավոր կերպով՝ ջնջելու համար հայ քաղաքակրթության հետքերը:

9-11-րդ դարերում մեր արվեստը մեծ վերածննունդ ապրեց, ստեղծվեցին անբասիր կերտվածքներ: Հետաքրքիր է, որ դրանց հիմքում առկա էր վաղ միջնադարի անուրանալի կնիքը, անսքող գործում էր հաջորդականության օրենքը: Ժամանակները ինչ որ խորհրդով կրկնվում են: Ինչպես երևում է, եկել է պահը նոր վերածնության:

Արդ խիստ այժմեական պետք է համարել Անիի ու պատմական Հայաստանի բոլոր բարձրարժեք հուշարձանները վերակերտել մեզ մոտ: Եկել է ժամանակը սթափ նայելու իրավիճակին և հենց որ առիթն ու հնարավորությունը ներկայանում են, առանց ժամանակ կորցնելու, առանց ձգձգումների իրականացնել մեր երազանքը:

Հայտնի է, որ վարպետները Լենինականում կրկնել էին Անիի մայր տաճարը: Այն դեկտեմբերի 7-ի աղետալի երկրաշարժից կործանվեց: Այդ եկեղեցին, իհարկե, կվերականգնվի, այս անգամ վարպետների ու ճարտարապետների համագործակցությամբ: Նույն հաջողությամբ մենք կարող ենք Ջվարթնոցը Երևանում վերականգնելուց բացի, վերականգնել-վերակրկնել Առաքելոց հինգգմբեթանի եկեղեցին Կիրովականում, Բախտագեղիկը՝ Չարենցավանում, Բագարանը՝ Աբովյանում, Հոնենցի եկեղեցին՝ Ստեփանավանում, Աբուհամրենցը՝ Սպիտակում, Խծկոնքի Սարգսի եկեղեցին՝ Լուսակերտում, Ամենափրկիչը՝ Եվրոպոլիսում և այլն: Այսպես վարվելով մենք կկարողանանք այդ անկրկնելի կոթողները ապագային հանձնել կանգուն վիճակում:

Անցյալ աշնանը գործի տնօրենները Երևանի մայր տաճարի տարողությունը նշում էին 5000-ից ավելի նստատեղով և այդ հիման վրա հրաժարվեցին Ջվարթնոցը կրկնելու գաղափարից: Այդ թիվը աստիճանաբար փոքրացնելով, ի վերջո կանգ են առել 2000-ի վրա: Այդ էլ մեծ թիվ է՝ ավելորդ ուռճացում, ինչպես վերջին տասնամյակներում բնորոշ է եղել մեր կյանքում հսկայամոլությունը, գիգանտոմանիան: 2000 նստատեղով աղոթասրահը ս. Էջմիածնի աղոթարանից մեծ է յոթ անգամ: Թվում է, թե ճիշտ կլիներ, եթե նոր եկեղեցում աղոթասրահի տարողությունը սահմանափակվեր 800-1000 նստատեղով, ինչպես և հոտնկայս տեղավորվեր ևս 800-1000 ունկնդիր:

Ջվարթնոցում ազատորեն կարող են տեղավորվել ժամասացության 2000-2500 ունկնդիրներ: Այս իրավիճակը մեզ իրավունք է տալիս կոչ անելու, որ դարձ կատարվի դեպի Ջվարթնոցը կրկնելու առաջին որոշումը: Այս դեպքում հնարավոր կլիներ

Եկեղեցու կառուցման աշխատանքներն սկսել անմիջապես: Նոր նախագծի ստեղծմանը 1-2 տարի հատկացնելը կարող է և ճակատագրական լինել:

Զվարթնոցի հարցի լուծումը առանձին անհատների իրավասությունից վեր է, այն պետք է տնօրինի ժողովուրդը:

ՏԻՐԱՆ ՄԱՐՈՒԹՅԱՆ

«Հայրենիքի ձայն», 12 մայիսի 1990 թ.: